

**CONVENIO DE COLABORACIÓN ENTRE A ACADEMIA GALEGA DE SEGURIDADE
PÚBLICA E A UNIVERSIDADE DE SANTIAGO DE COMPOSTELA EN MATERIA DE
FORMACIÓN**

A Estrada, 4 de marzo de 2019

COMPARECEN:

DUNHA PARTE, D Santiago Villanueva Álvarez, director xeral da ACADEMIA GALEGA DE SEGURIDADE PÚBLICA (en adiante, a AGASP), actuando en nome e representación da mesma en virtude das competencias que ten atribuídas polo artigo 12 da Lei 1/2007, do 15 de xaneiro, da Academia Galega de Seguridade Pública.

DOUTRA, D Antonio López Díaz, reitor magnífico da UNIVERSIDADE DE SANTIAGO DE COMPOSTELA (en adiante, a USC), con enderezo para os efectos deste convenio no Colexio de San Xerome, Praza do Obradoiro, s/n (Santiago de Compostela), actuando en nome e representación desta entidade, en virtude das facultades que lle outorga o artigo 20.1 da Lei orgánica 6/2001, do 21 de decembro, de Universidade

Ámbalas dúas partes, na calidade na que cada unha delas intervén, recoñécense reciprocamente a capacidade legal necesaria para obrigarse e outorgar o presente convenio e, para o efecto,

EXPOÑEN

PRIMEIRO. Que a USC é unha entidade de dereito público que desenvolve actividades de formación, investigación e desenvolvemento científico e tecnolóxico, interesada en colaborar coa AGASP na realización de actividades formativas de interese mutuo, aportando a posibilidade de recoñecer validez académica universitaria á realización de cursos e programas de formación no marco das devanditas actividades.

SEGUNDO. Que a AGASP, tal e como sinala o artigo 4 da Lei 1/2007, do 15 de xaneiro, pola que se establece a estrutura orgánica da mesma, ten entre as súas funcións as de organizar programas de formación, actualización e especialización profesional para os membros dos corpos de seguridade, singularmente as policía locais e a policía de Galicia.

TERCEIRO. Que a USC, a través do Instituto de Criminoloxía (en adiante ICUS), imparte os estudos de Diploma Superior en Criminoloxía, titulación propia da USC.

CUARTO. Que a AGASP e a USC están de acordo en establecer unha colaboración nos aspectos que resulten de común interese relacionados coa formación e o recoñecemento de estudos e titulacións dentro do eido policial, incluíndo a participación conxunta en proxectos de formación de ámbito universitario.

Para isto, a AGASP e a Universidade de Santiago de Compostela acordan subscribir o presente convenio, de acordo coas seguintes,

CLÁUSULAS:

PRIMEIRA.- O obxecto do presente convenio é articular a colaboración entre a AGASP e a USC para contribuír á realización e desenvolvemento do título universitario propio de “Diploma Superior en Criminoloxía”, así como facilitar a obtención deste título por parte dos alumnos da Academia Galega de Seguridade Pública de cara a facilitarlles a súa promoción interna e a carreira profesional.

SEGUNDA.- A AGASP se compromete a:

1. Colaborar na realización dos estudos de “Diploma Superior en Criminoloxía”, co-responsabilizándose da xestión, control, e dirección do “Prácticum” que comprenderá un mínimo de 80 horas totais de docencia presencial práctica nas instalacións da AGASP.
2. Propoñer ao profesorado axeitado para cada materia
3. Elaborar o programa formativo, asumindo o establecemento do horario lectivo das materias de acordo coas necesidades do ICUS e a realización das probas de avaliación precisas.

TERCEIRA.- A Universidade de Santiago de Compostela, a través do ICUS, asume as obrigas que de seguido se relacionan:

- 1.- Validar, a proposta da Comisión Mixta, as materias ou disciplinas que formen parte dos programas de estudos dos cursos selectivos organizados e impartidos pola AGASP con suxeición aos criterios adoptados polo Consello de Universidades e ás normas de xestión académica da USC.
- 2.- Facilitar a posibilidade de que actividades desenvolvidas nos cursos selectivos organizados e impartidos pola AGASP podan recoñecerse como créditos de libre elección para a libre configuración curricular dos membros das Forzas e Corpos de Seguridade que se matriculen nos títulos propios obxecto deste convenio.

- 3.- Facer constar a colaboración da AGASP en toda a información que se difunda sobre o curso, tanto nos medios de comunicación coma no material informativo e pedagóxico que se puidese distribuír.

CUARTA.- As actividades correspondentes ao “Prácticum” desenvolveranse nas instalacións da Academia Galega de Seguridade Pública e da Universidade de Santiago de Compostela, e para este fin as dúas entidades comprométense a facilitar os locais precisos debidamente acondicionados.

De ser necesario, poderán realizarse nas instalacións doutras entidades ou institucións determinadas actividades específicas.

O feito de colaborar como profesor nas materias correspondentes ao “Prácticum” non constituirá relación contractual entre os profesionais que desenvolvan esta labor e a USC ou a AGASP.

QUINTA.- Para optimizar os obxectivos e asegurar o cumprimento do presente convenio, constituirase unha Comisión Mixta que estará formada polas persoas que ocupen os cargos de director/a e secretario/a por parte do ICUS e director/a xeral e xefe/a do servizo de formación en Seguridade Pública, por parte da AGASP

As súas funcións serán:

- a) Propor as materias incluídas nos cursos selectivos que se desenvolven na AGASP que poden ser obxecto de validación de acordo cos criterios mencionados na cláusula terceira deste convenio.
- b) Establecer os plans e contidos das materias e disciplinas.
- c) Aprobar os programas das materias do “Prácticum” correspondente ao título propio Diploma Superior en Criminoloxía elaborados pola AGASP,

respectando o contido no plan de estudos.

- e) Controlar e avaliar o desenvolvemento das actividades relacionadas con este convenio, elaborando un informe ou memoria anual que deberá reflectir o grao de eficacia acadado e o interese amosado polos colectivos aos que se dirixen.
- f) Supervisar a execución do gasto naquelas actividades que se desenvolvan conxuntamente, tendo en conta a normativa específica aplicable a cada institución.
- g) Implementar e coordinar novas actuacións, temporais ou fixas, de resultaren necesarias para unha mellor formación e cumprimento dos fins que se establecen.
- h) Interpretar e resolver de xeito amigable as discrepancias que poidan xurdir na interpretación e aplicación do presente convenio.

SEXTA.- A Comisión Mixta poderá propoñer e desenvolver un programa de cursos ou seminarios, que se consideren de interese para a formación permanente dos colectivos recollidos neste convenio e axeitadas en relación aos estudos de Criminoloxía. Estes cursos desenvolveranse na sede da AGASP ou na do ICUS, e poderán ser elixidos polos alumnos para cursar como créditos de libre elección que figuran no plano de estudos. A Universidade facilitará o seu recoñecemento como tales con anterioridade a súa realización sempre que cumpran os requisitos da normativa universitaria.

SÉTIMA.- O ICUS farase cargo das retribucións dos profesores e colaboradores docentes nas materias correspondentes ao “Prácticum”.

OITAVA.- As controversias que xurdan como consecuencia da aplicación do presente convenio serán resoltas, en primeira instancia, pola Comisión Mixta e, de non chegar á resolución satisfactoria, o conflito será formulado ante o director xeral da AGASP e ante o reitor da USC, para que de mutuo acordo resolvan o procedente. De non chegar a tal acordo, as cuestións litixiosas xurdidas da aplicación do convenio serán resoltas na xurisdición contencioso-administrativa, por ser a natureza do presente convenio de carácter xurídico-administrativa.

NOVENA.- O presente convenio ten vixencia dende a data da súa sinatura ata un máximo de catro anos de duración. Unha vez rematados os catro anos de duración inicial poderá ser prorrogado, previo acordo escrito das partes, ata completar un período adicional de igual duración.

**POLA ACADEMIA GALEGA
DE SEGURIDADE PÚBLICA**

**POLA UNIVERSIDADE DE
SANTIAGO DE COMPOSTELA**

Santiago Villanueva Álvarez

Antonio López Díaz